

通鑑紀事本末

DS
747
c. 2
S7553 Y8
1873
v. 32

EAST ASIAN LIBRARY
UNIVERSITY OF TORONTO LIBRARY
130 St. George Street
8th FLOOR
TORONTO, CANADA M5S 1A5

University of Toronto
Library

C 403/62

ASIAN COLLE IN

Vertical text on the left margin, likely a page number or chapter indicator, written in a traditional Chinese style.

通鑑紀事本末卷一百四

宋建安袁樞編輯

明太倉張溥論正

赫連據朔方

晉安帝義熙三年 初魏主珪滅劉衛辰其子勃勃
犇秦秦高平公沒奕干以女妻之勃勃魁岸美容儀
性辯慧秦王興見而奇之與論軍國大事寵遇踰於
勳舊興弟邕諫曰勃勃不可近也興曰勃勃有濟世
之才吾方與之平天下奈何逆忌之乃以爲安遠將
軍使助沒奕干鎮高平以三城朔方雜夷及衛辰部

眾三萬配之使伺魏間隙邕固爭以爲不可興曰卿何以知其爲人邕曰勃勃奉上的慢御眾殘貪猾不仁輕爲去就寵之踰分恐終爲邊患興乃止久之竟以勃勃爲安北將軍五原公配以三交五部鮮卑及雜虜二萬餘落鎮朔方魏主珪歸所虜秦將唐小方於秦秦王興請歸賀狄干仍送良馬千匹以贖狄伯支珪許之勃勃聞秦復與魏通而怒乃謀叛秦柔然可汗社崙獻馬八千匹於秦至大城勃勃掠取之悉集其眾三萬餘人僞畋於高平川因襲殺沒奕干而并其眾勃勃自謂夏后氏之苗裔六月自稱大夏天王

大單于大赦改元龍升置百官

初魏王珪遣北部大人賀狄干獻馬千匹

求昏於秦秦王興止狄干而絕其昏於是秦魏有隙
秦王興遣尚書右僕射狄伯支等伐魏魏王珪自將
大軍擊之敗狄伯支及
越騎校尉唐小方等

冬十月夏王勃勃破鮮卑

薛干等三部降其眾以萬數進攻秦三城已北諸戍
斬秦將楊丕姚石生等諸將皆曰陛下欲經營關中
宜先固根本使人心有所憑係高平山川險固土田
饒沃可以定都勃勃曰卿知其一未知其二吾大業
草創士眾未多姚興亦一時之雄諸將用命關中未
可圖也我今專固一城彼必并力於我眾非其敵亡
可立待不如以驍騎風馳出其不意救前則擊後救

後則擊前使彼疲於犇命我則游食自若不及十年
嶺北河東盡爲我有待興旣死嗣子闇弱徐取長安
在吾計中矣於是侵掠嶺北嶺北諸城門不晝啟興
乃歎曰吾不用黃兒之言以至於此 十一月勃勃
又敗秦將張佛生於青石原俘斬五千餘人

四年夏五月秦王興使左僕射齊難帥騎二萬討勃
勃 秋七月夏王勃勃聞秦兵且至退保河曲齊難
以勃勃旣遠縱兵野掠勃勃潛師襲之俘斬七千餘
人難引兵退走勃勃追至木城禽之虜其將士萬三
千人於是嶺北夷夏附於勃勃者以萬數勃勃皆置

守宰以撫之

五年春正月秦王興遣其弟平北將軍沖征虜將軍狄伯支等帥騎四萬擊夏王勃勃沖至嶺北謀還襲長安伯支不從而止因酖殺伯支以滅口 夏四月夏王勃勃帥騎二萬攻秦掠取平涼雜胡七千餘戶進屯依力川 秋九月秦王興自將擊夏王勃勃至貳城遣安遠將軍姚詳等分督租運勃勃乘虛奄至興懼欲輕騎就詳等右僕射韋華曰若鑾輿一動眾心駭懼必不戰自潰詳營亦未必可至也興與勃勃戰秦兵大敗將軍姚榆生爲勃勃所禽左將軍姚文

崇等力戰勃勃乃退興還長安勃勃復攻秦敕奇堡
黃石固我羅城皆拔之徙七千餘家於大城以其丞
相右地代領幽州牧以鎮之

六年春三月夏王勃勃遣尙書胡金纂攻平涼秦王
興救平涼擊金纂殺之勃勃又遣兄子左將軍羅提
攻拔定陽阬將士四千餘人秦將曹熾曹雲王肆佛
等各將數千戶內徙興處之湟山及陳倉勃勃寇隴
右破白崖堡遂趣清水略陽太守姚壽都棄城走勃
勃徙其民萬六千戶於大城興自安定追之至壽渠
川不及而還

七年春正月秦姚詳屯杏城爲夏王勃勃所逼南犇大蘇勃勃遣平東將軍鹿奕干追斬之盡俘其眾勃勃南攻安定破尙書楊佛嵩於青石北原降其眾四萬五千進攻東鄉下之徙三千餘戶於貳城秦鎮北參軍王買德犇夏夏王勃勃問以滅秦之策買德曰秦德雖衰藩鎮猶固願且蓄力以待之勃勃以買德爲軍師中郎將秦王興遣衛大將軍常山公顯迎姚詳弗及遂屯杏城

八年冬十月秦王興以楊佛嵩爲雍州刺史帥嶺北見兵以擊夏行數日興謂羣臣曰佛嵩每見敵勇不

自制吾常節其兵不過五千人今所將旣多遇敵必敗行已遠追之無及將若之何佛嵩與夏王勃勃戰果敗爲勃勃所執絕亢而死

九年春三月夏王勃勃大赦改元鳳翔以叱干阿利領將作大匠發嶺北夷夏十萬人築都城於朔方水北黑水之南勃勃曰朕方統一天下君臨萬邦宜名新城曰統萬阿利性巧而殘忍蒸土築城錐入一寸卽殺作者而并築之勃勃以爲忠委任之凡造兵器成呈之工人必有死者射甲不入則斬弓人入則斬甲匠又鑄銅爲一大鼓飛廉翁仲銅駝龍虎之屬飾

以黃金列於宮殿之前凡殺工匠數千由是器物皆
精利勃勃自謂其祖從母姓爲劉非禮也古人氏族
無常乃改姓赫連氏言帝王係天爲子其徽赫與天
連也其非正統者皆以鐵伐爲氏言其剛銳如鐵皆
堪伐人也

十一年春三月夏王勃勃攻秦杏城拔之執守將姚
逵阮士卒二萬人秦王興如北地遣廣平公弼及輔
國將軍斂曼嵬向新平興還長安 秋九月夏赫連
建將兵擊秦執平涼太守姚軍都遂入新平廣平公
弼與戰於龍尾堡禽之

十二年春正月秦王興卒太子泓卽皇帝位大赦改元永和 夏六月氏王楊盛攻秦祁山拔之進逼秦州秦後將軍姚平救之盛引兵退平與上邽守將姚嵩追之夏王勃勃帥騎四萬襲上邽未至嵩與盛戰於竹嶺敗死勃勃攻上邽二旬克之殺秦州刺史姚軍都及將士五千餘人因毀其城進攻陰密又殺秦將姚良子及將士萬餘人以其子昌爲雍州刺史鎮陰密征北將軍姚恢棄安定犇還長安安定人胡儼等帥戶五萬據城降於夏勃勃使鎮東將軍羊苟兒將鮮卑五千鎮安定進攻秦鎮西將軍姚謚於雍城

諶委鎮犇長安勃勃據雍進掠鄯城秦東平公紹及
征虜將軍尹昭等將步騎五萬擊之勃勃退趨安定
胡儼閉門拒之殺羊苟兒及所將鮮卑復以安定降
秦紹進擊勃勃於馬鞍阪破之追至朝那不及而還
勃勃歸杏城楊盛復遣兄子倦擊秦至陳倉秦斂曼
鬼擊卻之夏王勃勃復遣兄子提南侵泄陽秦車騎
將軍姚裕等擊卻之

十三年夏王勃勃聞太尉裕伐秦乃進據安定秦嶺
北郡縣鎮戍皆降之太尉裕克秦東還畱次子桂
陽公義真爲都督夏王勃勃聞太尉裕東還乃以

其子撫軍大將軍瑣都督前鋒諸軍事帥騎二萬向
長安

十四年夏赫連瑣至渭龍驤將軍沈田子將兵拒之
田子殺王鎮惡王脩執田子斬之以冠軍將軍毛脩
之代鎮惡傅弘之大破赫連瑣夏兵乃退劉義真召
外軍入長安關中郡縣悉降於夏夏王勃勃進據咸
陽宋公裕召義真東歸以相國右司馬朱齡石代鎮
長安義真將士大掠而東赫連瑣帥眾追之傅弘之
等力戰晉兵大敗夏兵不窮追故得免長安百姓逐
朱齡石齡石犇潼關勃勃入長安

五事并見劉裕滅後秦

夏

王勃勃築壇於灞上卽皇帝位改元昌武

恭帝元熙元年春二月夏羣臣請都長安勃勃曰朕豈不知長安歷世帝王之都沃饒險固然晉人僻遠終不能爲吾患魏與我風俗略同土壤鄰接自統萬距魏境裁百餘里朕在長安統萬必危若在統萬魏必不敢濟河而西諸卿適未見此耳皆曰非所及也乃於長安置南臺以赫連瑁領大將軍雍州牧錄南臺尙書事勃勃還統萬大赦改元眞興勃勃性驕虐視民如草芥常居城上置弓劍於側有所嫌忿手自殺之羣臣廷視者鑿其目笑者決其脣諫者先截其

舌然後斬之

張溥曰魏司馬昭之使鄧艾鍾會伐蜀也蜀亡而鍾會作亂鄧艾檻車就徵姜維爲會謀主事將成矣敗於胡烈亂軍殺會衛瓘亦襲殺艾晉劉裕之滅後秦也王鎮惡沈田子功最多裕方東還田子矯殺鎮惡王脩討田子斬之劉義真又殺脩夏王勃勃遂陷長安會謀間艾欲舉大事田子殺鎮惡憾止爭功魏不失蜀晉失關中者何也魏與吳蜀三分天下蜀入於魏吳不能乘卽使姜維計行鍾會無死司馬昭出大師來

爭蜀未必爲兩人有也後秦鄰於魏夏裕入洛陽時崔浩知其克秦而歸地終爲魏有劉穆之卒裕決意東還王買德卽勸勃勃圖秦強敵逼介幼子鎮守又不能推誠大將鬪之使亂夏日窺間而攫直委之矣司馬昭克蜀則篡魏劉裕克關中則篡晉然令鍾會亂成魏不得蜀昭傳子炎必不敢篡懼有兩大國在也劉裕得關中其子失之不害其篡者關中之有無非東晉之所急也裕旣滅秦設畱長安經略西北功成一統晉之版圖其將焉往然裕之自知深矣夏或

可兼魏難猝滅與其不得晉也寧失關中是以
急行而不顧也裕伐秦而出篡晉而歸非獨晉
人知其篡也魏與夏皆知之鎮惡田子將帥相
殺上將有篡者下必有爭者其互殺無怪也夫
沈王交爭關中必危關中危義真必死裕豈不
念之然孺子可亡天位不可失明知之而明棄
之其後關中入夏義真逃歸亦義真之幸裕固
無暇爲之計萬全也裕初入長安議遷都洛陽
王仲德止之終於偏安江左勃勃得長安羣下
請都之不從旣而勃勃殂子昌立魏取統萬赫

連氏竟奔亡建國之地所係存亡廢興者大矣

通鑑紀事本末卷一百四

通鑑紀事本末卷一百五

宋建安袁樞編輯

明太倉張溥論正

魏滅北燕

晉安帝義熙十年秋八月辛丑魏主嗣遣謁者于什門使於燕于什門至和龍不肯入見曰大魏皇帝有詔須馮王出受然後敢入燕王跋使人牽逼令入什門見跋不拜跋使人按其項什門曰馮王拜受詔吾自以賓主致敬何苦見逼邪跋怒畱什門不遣什門數眾辱之左右請殺之跋曰彼各爲其主耳乃幽執

什門欲降之什門終不降久之衣冠弊壞略盡蟣蝨流溢跋遺之衣冠什門皆不受

十四年 初和龍有赤氣四塞蔽日自寅至申燕太

史令張穆言於燕王跋曰此兵氣也今魏方彊盛而執其使者好命不通臣竊懼焉跋曰吾方思之五月魏主嗣東巡至濡源及甘松遣征東將軍長孫道生安東將軍李先給事黃門侍郎奚觀帥精騎二萬襲燕又命驍騎將軍延普幽州刺史尉諾自幽州引兵趨遼西爲之聲勢嗣屯突門嶺以待之道生等拔乙連城進攻和龍與燕單于右輔古泥戰破之殺其將

皇甫軌燕王跋嬰城自守魏人攻不克掠其民萬餘家而還

宋文帝元嘉三年秋八月燕太子承卒立次子翼爲太子

七年秋八月燕太祖寢疾召中書監申秀侍中楊哲於內殿屬以後事九月病甚輦而臨軒命太子翼攝國事勒兵聽政以備非常宋夫人欲立其子受居惡翼聽政謂翼曰上疾將瘳奈何遽欲代父臨天下乎翼性仁弱遂還東宮日三往省疾宋夫人矯詔絕內外遣閹寺傳問而已翼及諸子大臣並不得見唯中

給事胡福獨得出入專掌禁衛福慮宋夫人遂成其謀乃言於司徒錄尚書事中山公弘弘與壯士數十人被甲入禁中宿衛皆不戰而散宋夫人命閉東閣弘家僮庫斗頭勁捷有勇力踰閣而入至於中堂射殺女御一人太祖驚懼而殂弘遂卽天王位遣人巡城告曰天降凶禍大行崩背太子不侍疾羣公不犇喪疑有逆謀社稷將危吾備介弟之親遂攝大位以寧國家百官叩門入者進階二等太子翼帥東宮兵出戰而敗兵皆潰去弘遣使賜翼死太祖有子百餘人弘皆殺之諡太祖曰文成皇帝葬長谷陵

九年春正月燕立慕容后之子王仁爲太子 夏五月
魏主治兵於南郊謀伐燕 六月庚寅魏主伐燕命
太子晃錄尙書事時晃纔五歲 秋七月己未魏主
至濡水庚申遣安東將軍奚斤發幽州民及密雲丁
零萬餘人運攻具出南道會和龍魏主至遼西燕王
遣其侍御史崔聘奉牛酒犒師己巳魏主至和龍
燕石城太守李崇等十郡降於魏魏發其民三萬穿
圍塹以守和龍崇績之子也八月燕王使數萬人出
戰魏昌黎公丘等擊破之死者萬餘人燕尙書高紹
帥萬餘家保羌胡固辛巳魏主攻紹斬之平東將軍

賀多羅攻帶方撫軍大將軍永昌王健攻建德驃騎大將軍樂平王丕攻冀陽皆拔之九月乙卯魏主引兵西還徙營丘成周遼東樂浪帶方玄菟六郡民三萬家於幽州燕尙書郭淵勸燕王送款獻女於魏乞爲附庸燕王曰負豐在前結忿已深降附取死不如守志更圖也魏主之圍和龍也宿衛之士多在戰陳行宮人少雲中鎮將朱脩之謀與南人襲殺魏主因入和龍浮海南歸以告冠軍將軍毛脩之毛脩之不從乃止旣而事泄朱脩之逃奔燕魏人數伐燕燕王遣脩之南歸求救脩之汎海至東萊遂還建康拜黃

門侍郎 初燕王嫡妃王氏生長樂公崇崇於兄弟
爲最長及卽位立慕容氏爲王后王氏不得立又黜
崇使鎮肥如崇母弟廣平公朗樂陵公邈相謂曰今
國家將亡人無愚智皆知之王復受慕容后之譖吾
兄弟死無日矣乃相與亡犇遼西說崇使降魏崇從
之會魏主使給事郎王德招崇十二月己丑崇使邈
如魏請舉郡降燕王聞之使其將封羽圍崇於遼西
十年春正月乙卯魏主遣永昌王健督諸軍救遼西
二月庚午魏主以馮崇爲都督幽平東夷諸軍事
車騎大將軍幽平二州牧封遼西王錄其國尙書事

食遼西十郡承制假受尙書刺史征虜已下官 夏
六月魏永昌王健左僕射安原督諸軍擊和龍將軍
樓敦別將五千騎圍凡城燕守將封羽以凡城降收
其三千餘家而還 秋八月馮崇上表請說降其父
魏主不聽

十一年春正月戊戌燕王遣使請和於魏魏主不許
三月辛巳燕王遣尙書高暉上表稱藩請罪於
魏乞以季女充掖庭魏主乃許之徵其太子王仁入
朝燕王送魏使者于什門還平城什門在燕二十一
年不屈節魏主下詔褒稱以比蘇武拜治書御史

夏六月燕王不遣太子質魏散騎常侍劉滋諫曰昔
劉禪有重山之險孫皓有長江之阻皆爲晉擒何則
彊弱之勢異也今吾弱於吳蜀而魏彊於晉不從其
欲將有危亡之禍願亟遣太子而脩政事撫百姓收
離散賑饑窮勸農桑省賦役社稷猶庶幾可保燕王
怒殺之辛亥魏主遣撫軍大將軍永昌王健等伐燕
收其禾稼徙民而還

十二年春正月燕王數爲魏所攻遣使詣建康稱藩
奉貢癸酉詔封爲燕王江南謂之黃龍國三月癸
亥燕王遣大將湯燭入貢於魏辭以太子王仁有疾

故未之遣 夏六月戊申魏主命驃騎大將軍樂平王丕鎮東大將軍徒河屈垣等帥騎四萬伐燕 秋七月己卯魏樂平王丕等至和龍燕王以牛酒犒軍獻甲三千屈垣責其不送侍子掠男女六千口而還 冬十一月魏人數伐燕燕日危蹙上下憂懼太常楊嘏復勸燕王速遣太子入侍燕王曰吾未忍爲此若事急且東依高麗以圖後舉嘏曰魏舉天下以擊一隅理無不克高麗無信始雖相親終恐爲變燕王不聽密遣尙書陽伊請迎於高麗

十三年春二月戊子燕王遣使入貢於魏請送侍子

魏主不許將舉兵討之壬辰遣使者十餘輩詣東方
高麗等諸國告諭之三月辛未魏平東將軍娥清
安西將軍古弼將精騎一萬伐燕平州刺史拓跋嬰
帥遼西諸軍會之夏四月魏娥清古弼攻燕白狼
城克之高麗遣其將葛盧孟光將眾數萬隨陽伊至
和龍迎燕王高麗屯於臨川燕尙書令郭生因民之
憚遷開城門納魏兵魏人疑之不入生遂勒兵攻燕
王王引高麗兵入自東門與生戰於闕下生中流矢
死葛盧孟光入城命軍士脫弊褐取燕武庫精仗以
給之大掠城中五月乙卯燕王帥龍城見戶東徙焚

宮殿火一旬不滅令婦人被甲居中陽伊等勒精兵居外葛盧孟光帥騎殿後方軌而進前後八十餘里古弼部將高荀子帥騎欲追之弼醉拔刀止之故燕王得逃去魏主聞之怒檻車徵弼及娥清至平城皆黜爲門卒戊午魏主遣散騎常侍封撥使高麗令送燕王
燕王 秋九月高麗不送燕王於魏遣使奉表稱當與馮弘俱奉王化魏主以高麗違詔議擊之將發隴右騎卒劉絜曰秦隴新民且當優復俟其饒實然後用之樂平王丕曰和龍新定宜廣脩農桑以豐軍實然後進取則高麗一舉可滅也魏主乃止

十五年 初燕王弘至遼東高麗王璉遣使勞之曰
龍城王馮君爰適野次士馬勞乎弘慙怒稱制讓之
高麗處之平郭尋徙北豐弘素侮高麗政刑賞罰猶
如其國高麗乃奪其侍人取其太子王仁爲質弘怨
高麗遣使來上表求迎上遣使者王白駒等迎之并
令高麗資遣高麗王不欲使弘南來遣將孫漱高仇
等殺弘於北豐并其子孫十餘人謚弘曰昭成皇帝
張溥曰慕容廆以晉元帝建武元年據遼東傳
皝僞暉共五十二年而滅於苻堅時帝奕之太
和五年也孝武帝太元九年慕容垂興爲後燕

距前燕之亡僅十一年耳垂在位十三年而殂
子寶立四年爲蘭汗所弑於是慕容盛稱北燕
都龍城慕容德稱南燕都廣固德僭立於隆安
之四年至超而滅於義熙之六年凡二世共十
有一年盛在位三年遇弑叔父熙立在位六年
高雲弑之雲立三年離班桃仁弑之馮跋自立
爲天王北燕促亡與南燕等獨馮跋及其弟弘
共享國二十八年方滅於後魏較之德盛歷數
爲長何歟慕容氏之初興也虜號邊豪孰懷奇
略儁則文武兼優加以機斷合三世之傑方能

龍旌帝服雄於燕冀及滅而再興也垂起少康
之一旅盛慕齊桓之復讎中山創社遼陰返舊
雖天命皆人力也馮跋裔出中州殊於醜虜然
跡史所稱恭慎而已豈有收羅趙魏驅駕英雄
之策哉慕容熙淫德騁怨跋與素弗萬泥等弑
之而立雲志在佐命榮寵血流左臂符命大事
非所敢言班仁弑雲李桑張泰奮劍斬除推跋
爲主跋讓素弗素弗不受乃卽位厲意農桑勤
心政事二十餘年而卒當四海戰爭之日叛換
昌黎優游壽考可謂非常材之厚幸乎馮弘跋

之少弟跋旣王封公管政萬泥乳陳作亂弘偕
張興聲討責其尋干戈於蕭牆棄友于爲閼伯
誅逆定難克脩弟道跋死忽篡殺其子百餘人
石虎秦生未踰其毒卽使魏師不出大命必盡
況負隅僻壤抗敵太武親子離背宮殿煙焚狼
嗥鼠齧能保適野無患乎棄城東徙身死高麗
傳檀入秦而鳩暮末降夏而誅弘其有同悲哉
夫前燕亡於暉其失也庸後燕亂於寶其失也
暗北燕亡於熙其失也淫南燕亡於超其失也
虐馮弘上無祖德內斬兄胤其惡甚於弑主延

鼎八年幸猶馮跋矣

通鑑紀事本末卷一百五

通鑑紀事本末卷一百六

宋建安袁樞編輯

明太倉張溥論正

魏滅夏

宋文帝元嘉元年夏主將廢太子璜而立少子酒泉公倫璜聞之將兵七萬北伐倫倫將騎三萬拒之戰於高平倫敗死倫兄太原公昌將騎一萬襲璜殺之并其眾八萬五千歸於統萬夏主大悅立昌爲太子夏主好自矜大名其四門東曰招魏南曰朝宋西曰服涼北曰平朔

二年秋八月夏武烈帝殂廟號世祖太子昌卽皇帝位大赦改元承光

三年夏六月魏主詔問公卿今當用兵赫連蠕蠕二國何先長孫嵩長孫翰奚斤皆曰赫連土著未能爲患不如先伐蠕蠕太常崔浩曰赫連氏土地不過千里政刑殘虐人神所棄宜先伐之尙書劉縉武京侯安原請先伐燕於是魏主自雲中西巡至五原因畋於陰山東至和兜山秋八月還平城九月魏主聞夏世祖殂諸子相圖國人不安欲伐之長孫嵩等皆曰彼若城守以逸待勞大檀聞之乘虛入寇此危

道也崔浩曰往年以來熒惑再守羽林鉤已而行其
占秦亡今年五星并出東方利以西伐天人相應不
可失也嵩固爭之帝大怒責嵩在官貪污命武士頓
辱之於是遣司空奚斤帥四萬五千人襲蒲坂宋兵
將軍周幾帥萬人襲陝城以河東太守薛謹爲鄉導
謹辨之子也魏主欲以中書博士平棘李順總前驅
之兵訪於崔浩浩曰順誠有籌略然臣與之婚姻深
知其爲人果於去就不可專委帝乃止 冬十月丁
巳魏主發平城 魏主行至君子津會天暴寒冰合
十一月戊寅帥輕騎二萬濟河襲統萬壬午冬至夏

主方燕羣臣魏師奄至上下驚擾魏主軍於黑水去城三十餘里夏主出戰而敗退走入城門未及閉內三郎豆代田帥眾乘勝入西宮焚其西門宮門閉代田踰宮垣而出魏主拜代田勇武將軍魏軍夜宿城北癸未分兵四掠殺獲數萬得牛馬十餘萬魏主謂諸將曰統萬未可得也它年當與卿等取之乃徙其民萬餘家而還夏弘農太守曹達聞周幾將至不戰而走魏師乘勝長驅遂入三輔會幾卒於軍中蒲坂守將東平公乙斗聞奚斤將至遣使詣統萬告急使者至統萬魏軍已圍其城還告乙斗曰統萬已敗矣

乙斗懼棄城西犇長安斤遂克蒲坂夏主之弟助興
先守長安乙斗至與助興棄長安西犇安定十二月
斤入長安

四年春正月乙酉魏主還平城統萬徙民在道多死
能至平城者什纔六七己亥魏主如幽州夏主遣平
原公定帥眾二萬向長安魏主聞之伐木陰山大造
攻具再謀伐夏 二月魏主還平城 三月丙子魏
主遣高涼王禮鎮長安禮斤之孫也又詔執金吾桓
貸造橋於君子津 夏四月魏奚斤與夏平原公定
相持於長安魏主欲乘虛伐統萬簡兵練士部分諸

將命司徒長孫翰等將三萬騎爲前驅常山王素等將步兵三萬爲後繼南陽王伏真等將步兵三萬部送攻具將軍賀多羅將精騎三千爲前候素遵之子也五月魏主發平城命龍驤將軍代人陸俟督諸軍鎮大磧以備柔然辛巳濟君子津魏主至拔鄰山築城捨輜重以輕騎三萬倍道先行羣臣咸諫曰統萬城堅非朝夕可拔今輕軍討之進不可克退無所資不若與步兵攻具一時俱往帝曰用兵之術攻城最下必不得已然後用之今以步兵攻具皆進彼必懼而堅守若攻不時拔食盡兵疲外無所掠進退無

地不如以輕騎直抵其城彼見步兵未至意必寬弛
吾羸形以誘之彼或出戰則成擒矣所以然者吾之
軍士去家二千餘里又隔大河所謂置之死地而後
生者也故以之攻城則不足決戰則有餘矣遂行
六月魏主至統萬分軍伏於深谷以少眾至城下夏
將狄子玉降魏言夏主聞有魏師遣使召平原公定
定曰統萬堅峻未易攻拔待我擒奚斤然後徐往內
外擊之蔑不濟矣故夏主堅守以待之魏主患之乃
退軍以示弱遣娥清及永昌王健帥騎五千西掠居
民魏軍士有得罪亡犇夏者言魏軍糧盡士卒食菜

輜重在後步兵未至宜急擊之夏主從之甲辰將步騎三萬出城長孫翰等皆言夏兵步陳難陷宜避其鋒魏主曰吾遠來求賊唯恐不出今旣出矣乃避而不擊彼奮我弱非計也遂收眾僞遁引而疲之夏兵爲兩翼鼓譟追之行五六里會有風雨從東南來揚沙晦冥宦者趙倪頗曉方術言於魏主曰今風雨從賊上來我向之彼背之天不助人且將士飢渴願陛下攝騎避之更待後日崔浩叱之曰是何言也吾千里制勝一日之中豈得變易賊貪進不止後軍已絕宜隱軍分出奄擊不意風道在人豈有常也魏主曰

善乃分騎爲左右隊以掎之魏主馬蹶而墜幾爲夏將所獲拓跋齊以身捍蔽決死力戰夏兵乃退魏主騰馬得上刺夏尙書斛黎文殺之又殺騎兵十餘人身中流矢奮擊不輟夏眾大潰齊翳槐之玄孫也魏人乘勝逐夏主至城北殺夏主之弟河南公滿及兄子蒙遜死者萬餘人夏主不及入城遂犇上邽魏主微服逐犇者入其城拓跋齊固諫不聽夏人覺之諸門悉閉魏主因與齊等入其宮中得婦人裙繫之槩上魏主乘之而上僅乃得免會日暮夏尙書僕射問至奉夏主之母出走長孫翰將八千騎追夏主至高

平不及而還乙巳魏主入城獲夏王公卿將校及諸母后妃姊妹宮人以萬數馬三十餘萬匹牛羊數千萬頭府庫珍寶車旗器物不可勝計頒賜將士有差初夏世祖性豪侈築統萬城高十仞基厚三十步上廣十步宮牆高五仞其堅可以厲刀斧臺榭壯大皆彫鏤圖畫被以綺繡窮極文采魏主顧謂左右曰慕容爾國而用民如此欲不亡得乎得夏太史令張淵徐辯復以爲太史令得故晉將毛脩之秦將軍庫洛干歸庫洛干於秦以毛脩之善烹調用爲大官令魏主見夏著作郎天水趙逸所爲文譽夏主太過怒曰此豎

無道何敢如是誰所爲邪當速推之崔浩曰文士褒
貶多過其實蓋非得已不足罪也乃止魏主納夏世
祖三女爲貴人奚斤與夏平原公定猶相拒於長安
魏主命宗正娥清太僕上堆帥騎五千略地關右定
聞統萬已破遂犇上邽斤追至雍不及而還清堆攻
夏貳城拔之魏主詔斤等班師斤上疏言赫連昌亡
保上邽鳩合餘燼未有蟠據之資今因其危滅之爲
易請益鎧馬平昌而還魏主不許斤固請乃許之給
斤兵萬人遣將軍劉拔送馬三千匹并畱娥清上堆
使共擊夏辛酉魏主自統萬東還以常山王素爲征

南大將軍假節與執金吾桓貸莫雲畱鎮統萬雲題之弟也

五年春二月魏平北將軍尉眷攻夏主於上邽夏主退屯平涼奚斤進軍安定與乚堆娥清軍合斤馬多疫死士卒乏糧乃深壘白固遣乚堆督租於民間士卒暴掠不設儆備夏主襲之堆兵敗以數百騎還城夏主乘勝日來城下鈔掠不得芻牧諸將患之監軍侍御史安頡曰受詔滅賊今更爲賊所困退守窮城若不爲賊殺當坐法誅進退皆無生理而諸王公晏然曾不爲計乎斤曰今軍士無馬以步擊騎必無勝

理當須京師救騎至合擊之頡曰今猛寇遊逸於外
吾兵疲食盡不一決戰則死在旦夕救騎何可待乎
等於就死死戰不亦可乎斤又以馬少爲辭頡曰今
歛諸將所乘馬可得二百匹頡請募敢死之士出擊
之就不能破敵亦可以折其銳且赫連昌狃而無謀
好勇而輕每自出挑戰眾皆識之若伏兵掩擊昌可
禽也斤猶難之頡乃陰與尉眷等謀選騎待之旣而
夏主來攻城頡出應之夏主白出陳前搏戰軍士識
其貌爭赴之會天大風揚塵晝昏夏主敗走頡追之
夏主馬蹶而墜遂擒之頡同之子也夏大將軍領司

徙平原王定收其餘眾數萬犇還平涼卽皇帝位大赦改元勝光三月辛巳赫連昌至平城魏主館之於西宮門內器用皆給乘輿之副又以妹始平公主妻之假常忠將軍賜爵會稽公以安頡爲建節將軍賜爵西平公尉眷爲寧北將軍進爵漁陽公魏主常使赫連昌侍從左右與之單騎共逐鹿深入山澗昌素有勇名諸將咸以爲不可魏主曰天命有在亦何所懼親遇如初奚斤自以爲元帥而昌爲偏裨所擒深恥之乃捨輜重齎三日糧追夏主於平涼娥清欲循水而往斤不從自北道邀其走路至馬髦嶺夏軍將

遁會魏小將有罪亡歸於夏告以魏軍食少無水夏主乃分兵邀斤前後夾擊之魏兵大潰斤及娥清劉拔皆爲夏所擒士卒死者六七千人丘堆守輜重在安定聞斤敗棄輜重犇長安與高涼王禮偕犇蒲坂夏人復取長安魏主大怒命安頡斬丘堆代將其眾鎮蒲坂以拒之 夏四月夏主遣使請和於魏魏主以詔諭之使降

六年春正月夏酒泉公雋自平涼犇魏 夏五月夏主欲復取統萬引兵東至侯尼城不敢進而還 夏主少凶暴無賴不爲世祖所知十月敗於陰槃登苟

藍山望統萬城泣曰先帝若以朕承大業者豈有今日之事乎

七年春三月壬寅魏封赫連昌爲秦王 秋九月己丑夏主遣其弟謂以代伐魏鄜城魏平西將軍始平公隗歸等擊之殺萬餘人謂以代遁去夏主自將數萬人邀擊隗歸於鄜城東畱其弟上谷公社干廣陽公度洛孤守平涼遣使來求和約合兵滅魏遙分河北自恆山以東屬宋以西屬夏魏主聞之治兵將伐夏羣臣咸曰劉義隆兵猶在河中捨之西行前寇未可必克而義隆乘虛濟河則失山東矣魏主以問崔

浩對曰義隆與赫連定遙相招引以虛聲唱和共窺大國義隆望定進定待義隆前皆莫敢先入譬如連雞不得俱飛無能爲害也赫連定殘根易摧擬之必仆克定之後東出潼關席卷而前則威震南極江淮以北無立草矣聖策獨發非愚近所及願陛下勿疑甲辰魏主如統萬遂襲平涼以衛兵將軍王斤鎮蒲坂冬十一月乙酉魏主至平涼夏上谷公社干等嬰城固守魏主使赫連昌招之不下乃使安西將軍古弼等將兵趣安定夏主自鄜城還安定將步騎二萬北救平涼與弼遇弼僞退以誘之夏主追之魏主

使高車馳擊之夏兵大敗斬首數千級夏主還走登
鶉觚原爲方陳以自固魏兵就圍之魏軍圍夏主
數日斷其水草人馬飢渴丁酉夏主引眾下鶉觚原
魏武衛將軍丘眷擊之夏眾大潰死者萬餘人夏主
中重創單騎走收其餘眾驅民五萬西保上邽魏人
獲夏主之弟丹楊公烏視拔武陵公禿骨及公侯以
下百餘人是日魏兵乘勝進攻安定夏東平公乙斗
棄城犇長安驅略數千家西犇上邽己亥魏主如
安定庚子還臨平涼掘塹圍之安慰初附赦秦雍之
民賜復七年夏隴西守將降魏十二月丁卯夏上

谷公社于廣陽公度洛孤出降魏克平涼關中侯豆
代田得奚斤娥清等獻於魏主魏主以夏主之后賜
代田命斤膝行執酒以奉代田謂斤曰全汝生者代
田也賜代田爵并陘侯加散騎常侍右衛將軍領內
都幢將夏長安臨晉武功守將皆走關中悉入於魏
魏主畱巴東公延普鎮安定以鎮西將軍王斤鎮長
安壬申魏主東還以奚斤爲宰士使負酒食以從王
斤驕矜不法信用左右調役百姓民不堪命南犇漢
川者數千家魏主案治得實斬斤以徇
八年夏六月夏主畏魏人之逼擁秦民十餘萬口自

治城濟河欲擊河西王蒙遜而奪其地吐谷渾王慕
瑱遣益州刺史慕利延寧州刺史拾虔帥騎三萬乘
其半濟邀擊之執夏主定以歸 秋八月吐谷渾王
慕瑱遣侍郎謝太寧奉表於魏請送赫連定

九年春三月壬申吐谷渾王慕瑱送赫連定於魏魏
人殺之

十一年春閏三月甲戌赫連昌叛魏西走丙子河西
候將格殺之魏人并其羣弟誅之

張溥曰晉之失中原也先之以劉淵繼之以石
勒時慕容據鄴成李據蜀張氏據涼其地晉皆

不能有也石氏滅苻氏起據有長安燕涼之地
皆入於堅桓溫經略中原僅能克蜀及苻堅敗
慕容復興呂光僭竊燕涼始貳姚萇弑堅盜長
安稱後秦滅呂氏涼分爲三乞伏氏介於秦涼
之間稱西秦旣而亂燕中亂燕亦分南北矣劉
裕匡晉亂南燕後秦咸殄裕東還後秦復陷於
夏當日馮跋則滅北燕西秦則滅南涼北涼則
滅西涼覆西秦晉亡宋興之日所存者惟北燕
馮氏涼沮渠氏夏赫連氏而已魏一舉而滅之
其有天下豈特三分之二哉宋文帝元嘉元年

魏太武燾之始光元年也燾卽位四年而滅夏
又八年而滅燕又三年而滅涼燕涼之亡師行
卽克伐夏則未易也夏之興繇赫連勃勃控朔
方而姚興不敢問襲長安而劉裕不能伐定都
統萬勒銘城南陰山之傑不弱於魏燾立一年
而勃勃死是天助魏也赫連昌立燾決謀西伐
先破長安後圖統萬昌棄城保上邽安頡攻禽
之烝徒飛翰亡不過稔然風雨馬蹶微服逐奔
燾幾不免殆亦之死而生矣北涼之強不若夏
後燕之強不若涼魏旣滅夏何有二國用兵之

道先近而後遠先難而後易燾蓋以赫連爲建
瓴也蒙遜包禍滅親勃勃凶殘害物揆以天道
災當及身然物情之所惡敵國之所畏也兩人
不死統萬十仞之城姑臧水草之地魏敢騁其
車轍乎赫連定合燼於平涼沮渠無諱跳跡於
鄯善餘兵再奮僅支歲月卽灑涕陰槃奉表建
康終於老病誅死安能復反故國哉

通鑑紀事本末卷一百六

通鑑紀事本末卷一百七

宋建安袁樞編輯

明太倉張溥論正

魏滅北涼

宋文帝元嘉七年冬十一月河西王蒙遜遣尙書郎宗舒等入貢於魏魏主與之宴執崔浩之手以示舒等曰汝所聞崔公此則是也才略之美於今無比朕動止咨之豫陳成敗若合符契未嘗失也

八年秋八月乙酉河西王蒙遜遣子安周入侍於魏九月魏主欲選使者詣河西崔浩薦尙書李順乃

以順爲太常拜河西王蒙遜爲侍中都督涼州西域
羌戎諸軍事太傅行征西大將軍涼州牧涼王王武
威張掖敦煌酒泉西海金城西平七郡册曰盛衰存
亡與魏升降北盡窮髮南極庸嶭西被崑嶺東至河
曲王實征之以夾輔皇室置將相羣卿百官承制假
授建天子旌旗出入警蹕如漢初諸侯王故事

九年冬十二月魏李順復奉使至涼涼王蒙遜遣中
兵校郎楊定歸謂順曰年衰多疾腰髀不隨不堪拜
伏比三五日消息小差當相見順曰王之老疾朝廷
所知豈得自安不見詔使明日蒙遜延順入至庭中

蒙遜箕坐隱几無動起之狀順正色入言曰不謂此
叟無禮乃至於此今不憂覆亡而敢陵侮天地魂魄
逝矣何用見之握節將出涼王使定歸追止之曰太
常旣雅恕哀疾傳聞朝廷有不拜之詔是以敢自安
耳順曰齊桓公九合諸侯一匡天下周天子賜胙命
無下拜桓公猶不敢失臣禮下拜登受今王雖功高
未如齊桓朝廷雖相崇重未有不拜之詔而遽自偃
蹇此豈社稷之福邪蒙遜乃起拜受詔使還魏主問
以涼事順曰蒙遜控制河右踰三十年經涉艱難粗
識機變綏集荒裔羣下畏服雖不能貽厥孫謀猶足

以終其一世然禮者德之興敬者身之基也蒙遜無禮不敬以臣觀之不復年矣魏主曰易世之後何時當滅順曰蒙遜諸子臣略見之皆庸才也如聞敦煌太守牧犍器性粗立繼蒙遜者必此人也然比之於父皆云不及此殆天之所以資聖明也魏主曰朕方有事東方未暇西略如卿所言不過數年之外不爲晚也初蜀賓沙門曇無讖自云能使鬼治病且有祕術涼王蒙遜甚重之謂之聖人諸女及子婦皆往受術魏主聞之使李順往徵之蒙遜畱不遣仍殺之魏主由是怒涼蒙遜荒淫猜虐羣下苦之

十年夏四月涼王蒙遜病甚國人共議以世子菩提
幼弱立菩提之兄敦煌太守牧犍爲世子加中外都
督大將軍錄尙書事蒙遜卒謚曰武宣王廟號太祖
牧犍卽河西王位大赦改元永和立子封壇爲世子
加撫軍大將軍錄尙書事遣使請命於魏牧犍聰穎
好學和雅有度量故國人立之先是魏主遣李順迎
武宣王女爲夫人會卒牧犍稱先王遺意遣左丞宋
繇送其妹興平公主於魏拜右昭儀魏主謂李順曰
卿言蒙遜死今則驗矣又言牧犍立何其妙哉朕克
涼州亦當不遠於是賜絹十匹廐馬一乘進號安西

將軍寵待彌厚政事無巨細皆與之參議遣順拜牧
犍都督涼沙河三州西域羌戎諸軍事車騎將軍開
府儀同三司涼州刺史河西王以宋繇爲河西王右
相牧犍以無功受賞畱順上表乞安平一號優詔不
許牧犍尊敦煌劉昉爲國師親拜之命官屬以下皆
北面受業

十一年夏四月河西王牧犍遣使上表告嗣位戊寅
詔以牧犍爲都督涼秦等四州諸軍事征西大將軍
涼州刺史河西王

十二年春正月有老父投書於敦煌東門求之不獲

書曰涼王三十年若七年河西王牧犍以問奉常張
慎對曰昔虢之將亡神降於莘願陛下崇德脩政以
享三十之祚若盤於遊田荒於酒色臣恐七年將有
大變牧犍不悅

十四年冬十一月魏主以其妹武威公主妻河西王
牧犍河西王遣宋繇奉表詣平城謝且問其母及公
主所宜稱魏主使羣臣議之皆曰母以子貴妻從夫
爵牧犍母宜稱河西國太后公主於其國稱王后於
京師則稱公主魏主從之牧犍遣將軍沮渠旁周入
貢於魏魏主遣侍中古弼尙書李順賜其侍臣衣服

并徵世子封壇入侍是歲牧犍遣封壇如魏李順自河西還魏主問之曰卿往年言取涼州之策朕以東方有事未遑也今和龍已平吾欲卽以此年西征可乎對曰臣疇昔所言以今觀之私謂不謬然國家戎車屢動士馬疲勞西征之議請俟它年魏主乃止

十六年春三月河西王牧犍通於其嫂李氏兄弟三人傳嬖之李氏與牧犍之姊共毒魏公主魏主遣解毒醫乘傳救之得愈魏主徵李氏牧犍不遣厚資給使居酒泉魏每遣使者詣西域常詔牧犍發導護送出流沙使者自西域還至武威牧犍左右有告魏使

者曰我君承蠕蠕可汗妄言云去歲魏天子自來伐我士馬疫死大敗而還我擒其長弟樂平王丕我君大喜宣言於國又聞可汗遣使告西域諸國稱魏已削弱今天下唯我爲彊若更有魏使勿復供奉西域諸國頗有二心使還具以狀聞魏主遣尙書賀多羅使涼州觀虛實多羅還亦言牧犍雖外脩臣禮內實乖悖魏主欲討之以問崔浩對曰牧犍逆心已露不可不誅官軍往年北伐雖不克獲實無所損戰馬三十萬匹計在道死傷不滿八千常歲羸死亦不減萬匹而遠方乘虛遽謂衰耗不能復振今出其不意大

軍猝至彼必駭擾不知所爲擒之必矣魏主曰善吾意亦以爲然於是大集公卿議於西堂弘農王奚斤等三十餘人皆曰牧犍西垂下國雖心不純臣然繼父位以來職貢不乏朝廷待以藩臣妻以公主今其罪惡未彰宜加恕宥國家新征蠕蠕士馬疲弊未可大舉且聞其土地鹵瘠難得水草大軍旣至彼必嬰城固守攻之不拔野無所掠此危道也初崔浩惡尙書李順順使涼州凡十二返魏主以爲能涼武宣王數與順遊宴對其羣下時爲驕慢之語恐順泄之隨以金寶納於順懷順亦爲之隱浩知之密以白魏主

魏主未之信及議伐涼州順與尙書古弼皆曰自溫
圍水以西至姑臧地皆枯石絕無水草彼人言姑臧
城南天梯山上冬有積雪深至丈餘春夏消釋下流
成川居民引以溉灌彼聞軍至決此渠口水必乏絕
環城百里之內地不生草人馬飢渴難以久留斤等
之議是也魏主乃命浩與斤等相詰難眾無復它言
但云彼無水草浩曰漢書地理志稱涼州之畜爲天
下饒若無水草畜何以蕃又漢人終不於無水草之
地築城郭建郡縣也且雪之消釋僅能斂塵何得通
渠溉灌乎此言大爲欺誣矣李順曰耳聞不如目見

吾嘗目見何可共辯浩曰汝受人金錢欲爲之遊說
謂我目不見便可欺邪帝隱聽聞之乃出見斤等辭
色嚴厲羣臣不敢復言唯唯而已羣臣旣出振威將
軍代人伊敫言於帝曰涼州若果無水草彼何以爲
國眾議皆不可用宜從浩言帝善之夏五月丁丑魏
主治兵於西郊六月甲辰發平城使侍中宜都王穆
壽輔太子晃監國決畱臺事內外聽焉又使大將軍
長樂王嵇敬輔國大將軍建寧王崇將二萬人屯漠
南以備柔然命公卿爲書以讓河西王牧犍數其十
二罪且曰若親帥羣臣委贄遠迎謁拜馬首上策也

六軍旣臨面縛輿櫬其次也若守迷窮城不時悛悟
身死族滅爲世大戮宜思厥中自求多福 魏主自
雲中濟河秋七月己巳至上郡屬國城壬午畱輜重
部分諸軍使撫軍大將軍永昌王健尙書令劉縈與
常山王素爲前鋒兩道並進驃騎大將軍樂平王丕
太宰陽平王杜超爲後繼以平西將軍源賀爲鄉導
魏主問賀以取涼州方略對曰姑臧城旁有四部鮮
卑皆臣祖父舊民臣願處軍前宣國威信示以禍福
必相帥歸命外援旣服然後取其孤城如反掌耳魏
主曰善八月甲午永昌王健獲河西畜產二十餘萬

河西王牧犍聞有魏師驚曰何爲乃爾用左丞姚定國計不肯出迎求救於柔然遣其弟征南大將軍董來將兵萬餘人出戰於城南望風犇潰劉絜用卜者言以爲日辰不利斂兵不追董來遂得入城魏主由是怒之丙申魏主至姑臧遣使諭牧犍令出降牧犍聞柔然欲入魏邊爲寇冀幸魏主東還遂嬰城固守其兄子祖趯城出降魏主具知其情乃分軍圍之源賀引兵招慰諸部下三萬餘落故魏主得專攻姑臧無復外慮魏主見姑臧城外水草豐饒由是恨李順謂崔浩曰卿之昔言今果驗矣對曰臣之言不敢不

實類皆如此魏主之將伐涼州也太子晃亦以爲疑至是魏主賜太子詔曰姑臧城西門外涌泉合於城北其大如河自餘溝渠流入漠中其間乃無燥地故有此敕以釋汝疑 九月丙戌河西王牧犍兄子萬年帥所領降魏姑臧城潰牧犍帥其文武五千入面縛請降魏主釋其縛而禮之收其城內戶口二十餘萬倉庫珍寶不可勝計使張掖王禿髮保周龍驤將軍穆羆安遠將軍源賀分徇諸郡雜胡降者又數十萬初牧犍以其弟無諱爲沙州刺史都督建康以西諸軍事領酒泉太守宜得爲秦州刺史都督丹嶺以

西諸軍事領張掖太守安周爲樂都太守從弟唐兒爲敦煌太守及姑臧破魏主遣鎮南將軍代人奚眷擊張掖鎮北將軍封沓擊樂都宜得燒倉庫西犇酒泉安周南犇吐谷渾封沓掠數千戶而還奚眷進攻酒泉無諱宜得收遺民犇晉昌遂就唐兒於敦煌魏主使弋陽公元絜守酒泉及武威張掖皆置將守之魏主置酒姑臧謂羣臣曰崔公智略有餘吾不復以爲奇伊馭弓馬之士而所見乃與崔公同此深可奇也冬十月辛酉魏主東還畱樂平王丕及征西將軍賀多羅鎮涼州徙沮渠牧犍宗族及吏民三萬戶於

平城 十二月壬午魏主至平城猶以妹壻待沮渠
牧犍征西大將軍如故牧犍母卒葬以太妃之禮武
宣王置守冢三十家涼州自張氏以來號爲多士沮
渠牧犍尤喜文學以敦煌闕駟爲姑臧太守張湛爲
兵部尙書劉昺索做陰興爲國師助教金城宋欽爲
世子洗馬趙柔爲金部郎廣平程駿駿從弟弘爲世
子侍講魏主克涼州皆禮而用之

十七年春正月己酉沮渠無諱寇魏酒泉元絜輕之
出城與語王子無諱執絜以圍酒泉 三月沮渠無
諱拔酒泉 夏四月庚辰沮渠無諱寇魏張掖丙戌

魏主遣撫軍大將軍永昌王健督諸將討之。五月乙巳沮渠無諱復圍張掖不克退保臨松魏主不復加討但以詔諭之。秋八月甲申沮渠無諱使其中部尉梁偉詣魏永昌王健請降歸酒泉郡及所虜將士元絜等魏主使尉眷畱鎮涼州

十八年春正月癸卯魏以沮渠無諱爲征西大將軍涼州牧酒泉王。三月辛亥魏賜沮渠萬年爲張掖王。夏四月沮渠唐兒叛沮渠無諱無諱畱從弟天周守酒泉與弟宜得引兵擊唐兒唐兒敗死魏以無諱終爲邊患庚辰遣鎮南將軍奚眷擊酒泉。冬十

一月酒泉城中食盡萬餘口皆餓死沮渠天周殺妻以食戰士庚子魏奚眷拔酒泉獲天周送平城殺之沮渠無諱乏食且畏魏兵之盛乃謀西度流沙遣其弟安周西擊鄯善鄯善王欲降會魏使者至勸令拒守安周不能克退保東城

十九年夏四月沮渠無諱將萬餘家棄敦煌西就沮渠安周末至鄯善王比龍畏之將其眾犇且末其世子降於安周無諱遂據鄯善其士卒經流沙渴死者大半李寶自伊吾帥眾二千入據敦煌繕脩城府安集故民沮渠牧犍之亡也涼州人闕爽據高昌自稱

太守唐契爲柔然所逼擁眾西趨高昌欲奪其地柔然遣其將阿若追擊之契敗死契弟和收餘眾犇車師前部王伊洛時沮渠安周屯橫截城和攻拔之又拔高寧白力二城遣使請降於魏唐契之攻闕爽也爽遣使詐降於沮渠無諱欲與之共擊契八月無諱將其眾趨高昌比至契已死爽閉門拒之九月無諱將衛興奴夜襲高昌屠其城爽犇柔然無諱據高昌遣其常侍汜雋奉表詣建康詔以無諱爲都督涼河沙三州諸軍事征西大將軍河州刺史河西王二十一年秋九月甲辰以沮渠安周爲都督涼河沙

三州諸軍事河州刺史河西王

二十四年 魏師之克敦煌也沮渠牧犍使人斫開府庫取金玉及寶器因不復閉小民爭入盜取之有司索盜不獲至是牧犍所親及守藏者告之且言牧犍父子多蓄毒藥潛殺人前後以百數姊妹皆學左道有司索牧犍家得所匿物魏主大怒賜沮渠昭儀死并誅其宗族唯沮渠祖以先降得免又有告牧犍猶與故臣民交通謀反者三月魏主遣崔浩就第賜牧犍死諡曰哀王

張溥曰西秦之乾歸弒於公府南梁之僞檀鵠

於熾磐兩人雄霸啟國不免凶終窮兵厚亡自
貽其毒抑悖惡未若大沮渠蒙遜甚也蒙遜殺
兄弑君鴟跖河西淫忌忍戮閨庭無禮新臺之
變閭人王懷祖擊之傷足不死妻孟氏擒斬之
夷其三族竟保考終享年六十六在僞位者三
十三年其得天幸又過馮跋豈惡積滅身於夷
狄獨不信歟蒙遜病死菩提幼弱乃立牧犍固
謂好學雅量國人所悅成君以後何其淫逞也
慕容垂之立寶慕容德之立超咸采譽青宮馳
聲風表一當大位卽喪身殞國爲世僂笑牧犍

器性遠謝寶超加以蒙遜貽謀不辨男女姊妹
受術於沙門李氏傳嬖於宮掖朋行淫佚寧復
知恥魏太武與涼和親日夜謀西略蒙遜存時
嫌釁已見牧犍無道適授以名大師親征聲罪
十二姑臧城潰面縛來降燉煌老父之書帶石
七年之讖期數不爽又未可謂無天也李順初
使於涼歸告魏主言其可圖金寶入懷巧言沮
計崔浩厲詞折之伊戾請主決討水草豐饒軍
行告捷順後伏誅貪人罰均矣牧犍依棲魏朝
猶以武威公主之戚齒列貴臣未幾賜死女襲

母爵或疑太武好殺不仁然禿髮傉檀之女不
嘗爲秦王熾磐后乎傉檀困敗歸秦父子俱死
彼恃婚姻而來身卽死於婚姻牧犍於魏又何
可託也西秦暮末之逼於蒙遜也不得已而臣
魏魏遣庫結迎之吉毗止其內徙爲夏所殺北
燕馮弘與魏戰數困楊嶠勸弘速遣太子入侍
魏不從而請迎於高麗王璉遂死北豐秦燕之
主殞首他國者以不入魏也牧犍入魏而復死
魏何以勸來者乎大國方奮殺降之威亡王尙
覬議親之典天下所以共笑其愚也

通鑑記事本末卷一百七

通鑑記事本末

卷一百七

七

通鑑紀事本末卷一百七

通鑑紀事本末卷一百八

宋建安袁樞編輯

明太倉張溥論正

魏平仇池

晉孝武帝大元十年冬十月西燕主冲遣尙書令高蓋帥眾五萬伐後秦戰於新平南蓋大敗降於後秦初蓋以楊定爲子及蓋敗定亡犇隴右復收集其舊眾定佛奴之孫也十一月衛將軍楊定徙治厯城置儲蓄於百頃自稱龍驤將軍仇池公遣使來稱藩詔因其所號假之其後又取天水略陽之地自稱秦

州刺史隴西王

十九年冬十月秦主崇爲梁王乾歸所逐犇隴西王
楊定定與崇共攻乾歸乾歸遣涼州牧軻彈等拒之
大敗定兵殺定及崇定無子其叔父佛狗之子盛先
守仇池自稱征西將軍秦州刺史仇池公謚定爲武
王仍遣使來稱藩秦太子宣犇盛

二十一年冬十二月楊盛遣使來請命詔拜盛鎮南
將軍仇池公盛表苻宣爲平北將軍

安帝隆安二年楊盛遣使附魏魏以盛爲仇池王
義熙元年夏六月秦隴西公碩德伐仇池屢破楊盛

兵 秋七月楊盛請降於秦秦以盛爲都督益寧二州諸軍事征南大將軍益州牧

三年夏四月氏王楊盛以平北將軍苻宣爲梁州督護將兵入漢中秦梁州別駕呂瑩等起兵應之刺史王敏攻之瑩等求援於盛盛遣軍臨瀘口敏退屯武興盛復通於晉晉以盛爲都督隴右諸軍事征西大將軍開府儀同三司盛因以宣行梁州刺史

八年冬十月仇池公楊盛叛秦侵擾祁山秦王興遣建威將軍趙琨爲前鋒立節將軍姚伯壽繼之前將軍姚恢出驚峽秦州刺史姚嵩出羊頭峽右衛將軍

胡翼度出汧城以討盛興自雍赴之與諸將會於隴口天水太守王松恩言於嵩曰先帝神略無方徐洛生以英武佐命再入仇池無功而還非楊氏智勇能全也直地勢險固耳今以趙琨之眾使君之威準之先朝實未見成功使君具悉形便何不表聞嵩不從盛帥眾與琨相持伯壽畏懦不進琨眾寡不敵爲盛所敗興斬伯壽而還

十二年夏六月氏王楊盛攻秦祁山拔之進逼秦州秦後將軍姚平救之盛引兵退平與上邽守將姚嵩追之嵩與盛戰於竹嶺敗死

宋高祖永初三年夏四月乙亥詔封仇池公楊盛爲
武都王

文帝元嘉二年夏六月武都惠文王楊盛卒初盛聞
晉亡不改義熙年號謂世子玄曰吾老矣當終爲晉
臣汝善事宋帝及盛卒玄自稱都督隴右諸軍事征
西大將軍開府儀同三司秦州刺史武都王遣使來
告喪始用元嘉年號

三年冬十月仇池氏楊興平求內附梁南秦二州刺
史吉翰遣始平太守龐諮據武興氏王楊玄遣其弟
難當將兵拒諮諮擊走之

四年秋九月氏王楊玄遣將軍苻白作圍秦梁州刺史出連輔政於赤水城中糧盡民執輔政以降輔政至駱谷逃還 冬十月秦以驍騎將軍吳漢爲平南將軍梁州刺史鎮南澠 十一月魏主遣軍司馬公孫軌兼大鴻臚持節策拜楊玄爲都督荆梁等四州諸軍事梁州刺史南秦王及境玄不出迎軌責讓之欲奉策以還玄懼而郊迎

六年秋七月武都孝昭王楊玄疾病欲以國授其弟難當難當固辭請立玄子保宗而輔之玄許之玄卒保宗立難當妻姚氏勸難當自立難當乃廢保宗自

稱都督雍涼秦三州諸軍事征西大將軍開府儀同三司秦州刺史武都王

七年夏六月己卯以氏王楊難當爲冠軍將軍秦州刺史武都王

九年夏六月加北秦州刺史楊難當征西將軍難當以兄子保宗爲鎮南將軍鎮宕昌以其子順爲秦州刺史守上卦保宗謀襲難當事泄難當囚之

十年夏四月帝聞梁南秦二州刺史甄法護刑政不治失氏羌之和乃自徒中起蕭思話爲梁南秦二州刺史法護法崇之兄也 秋九月戊午魏主遣兼大

鴻臚崔隤持節拜氏王楊難當爲征南大將軍開府儀同三司秦梁二州牧南秦王隤逞之子也 楊難當因蕭思話未至甄法護將下舉兵襲梁州破白馬獲晉昌太守張範敗法護參軍魯安期等又攻葭萌獲晉壽太守范延朗冬十一月丁未法護棄城犇洋川之西城難當遂有漢中之地以其司馬趙溫爲梁秦二州刺史

十一年春正月楊難當以克漢中告捷於魏送雍州流民七千家於長安蕭思話至襄陽遣橫野司馬蕭承之爲前驅承之緣道收兵得千人進據礪頭楊難

當焚掠漢中引眾西還畱趙溫守梁州又遣其魏興太守薛健據黃金山思話遣陰平太守蕭坦攻鐵城戍拔之二月趙溫薛健與其馮翊太守蒲甲子合攻坦營坦擊破之溫等退保西水臨川王義慶遣龍驤將軍裴方明將三千人助承之拔黃金戍而據之溫棄州城退據小城健甲子退保下桃城思話繼至與承之共擊趙溫等屢破之行參軍王靈濟別將出洋川攻南城拔之擒其守將趙英南城空無所資靈濟引兵還與承之合三月楊難當遣其子和將兵與蒲甲子等共擊蕭承之相拒四十餘日圍承之數十

重短兵接弓矢無所復施氏悉衣犀甲戈矛所不能入承之斷稍長數尺以大斧椎之一稍輒貫數人氏不能當燒營走據大桃閭月承之等追擊之至南城氏敗走斬獲甚眾悉收漢中故地置戍於葭萌水初桓希旣敗氏王楊盛據漢中梁州刺史范元之傳歆皆治魏興唯得魏興上庸新城三郡及索邈爲刺史乃治南城至是南城爲氏所焚不可復固蕭思話徙鎮南鄭夏四月甄法護坐委鎮賜死於獄楊難當遣使奉表謝罪帝下詔赦之

十二年楊難當釋楊保宗之囚使鎮童亭

十三年春三月氏王楊難當自稱大秦王改元建義立妻爲王后世子爲太子置百官皆如天子之制然猶貢奉宋魏不絕 赫連定之西遷也楊難當遂據上邽秋七月魏主遣驃騎大將軍樂平王丕尙書令劉絜督河西高平諸軍以討之先遣平東將軍崔曠齎詔書諭難當 九月庚戌魏樂平王丕等至略陽楊難當懼請奉詔攝上邽守兵還仇池諸將議以爲不誅其豪帥軍還之後必相聚爲亂又大眾遠出不有所掠無以充軍實賞將士丕將從之中書侍郎高允參丕軍事諫曰如諸將之謀是傷其向化之心大

軍旣還爲亂必速丕乃止撫慰初附秋毫不犯秦隴
遂安難當以其子順爲雍州刺史守下辯

十六年春三月楊保宗與兄保顯自童亭奔魏庚寅
魏主以保宗爲都督隴西諸軍事征西大將軍開府
儀同三司秦州牧武都王鎮上邽妻以公主保顯爲
鎮西將軍晉壽公 冬十二月氏王楊難當將兵數
萬寇魏上邽秦州人多應之東平呂羅漢說鎮將拓
拔意頭曰難當眾盛今不出戰示之以弱眾情離沮
不可守也意頭遣羅漢將精騎千餘出衝難當陳所
向披靡殺其左右騎八人難當大驚會魏主以璽書

責讓難當難當引還仇池

十七年大秦王楊難當復稱武都王

十八年冬十一月氏王楊難當領國入寇謀據蜀土
遣其建忠將軍苻冲出東洛以禦梁州兵梁秦二州
刺史劉真道擊冲斬之真道懷敬之子也難當攻拔
葭萌獲晉壽太守申坦遂圍涪城巴西梓潼二郡太
守劉道錫嬰城固守難當攻之十餘日不克乃還道
錫道產之弟也十二月癸亥詔龍驤將軍裴方明等
帥甲士三千人又發荆雍二州兵以討難當皆受劉
真道節度

十九年夏五月裴方明等至漢中與劉真道分兵攻武興下辯白水皆取之楊難當遣建節將軍苻弘祖守蘭臯使其子撫軍大將軍和將重兵爲後繼方明與弘祖戰於濁水大破之斬弘祖和退走追至赤亭又破之難當犇上邽獲難當兄子建節將軍保熾難當以其子虎爲益州刺史守陰平聞難當走引兵還至下辯方明使其子肅之邀擊之擒虎送建康斬之仇池平以輔國司馬胡崇之爲北秦州刺史鎮其地立楊保熾爲楊立後使守仇池魏人遣中山王辰迎楊難當詣平城秋七月以劉真道爲雍州刺史裴方

明爲梁南秦二州刺史方明辭不拜丙寅魏主使安
西將軍古弼督隴右諸軍及殿中虎賁與武都王楊
保宗自祁山南入征西將軍漁陽皮豹子與琅邪王
司馬楚之督關中諸軍自散關西入俱會仇池又使
譙王司馬文思督洛豫諸軍南趨襄陽征南將軍刁
雍東趨廣陵移書徐州稱爲楊難當報仇

二十年春正月魏皮豹子等進擊樂鄉將軍王奐之
等敗沒魏軍進至下辯將軍強立明等敗死二月
胡崇之與魏戰於濁水崇之爲魏所擒餘眾走還漢
中將軍姜道祖兵敗降魏魏遂取仇池楊保熾走

魏河間公齊與武都王楊保宗對鎮維谷保宗弟文德說保宗令閉險自固以叛魏或以告齊夏四月齊誘執保宗送平城殺之前鎮東司馬苻達征西從事中郎任肅等遂舉兵立楊文德爲主據白崖分兵取諸戍進圍仇池自號征西將軍秦河梁三州牧仇池公五月魏古弼發上邽高平岷城諸軍擊楊文德文德退走皮豹子督關中諸軍至下辯聞仇池解圍欲還弼遣人謂豹子曰宋人恥敗必將復來軍還之後再舉爲難不如練兵蓄力以待之不出秋冬宋師必至以逸待勞無不克矣豹子從之魏以豹子爲仇

池鎮將楊文德遣使來求援秋七月癸丑詔以文德爲都督北秦雍二州諸軍事征西大將軍北秦州刺史武都王文德屯葭蘆城以任肅爲左司馬武都陰平氏多歸之甲子前雍州刺史劉眞道梁南秦州刺史裴方明坐破仇池滅匿金寶及善馬下獄死冬十一月將軍姜道盛與楊文德合眾二萬攻魏濁水城魏皮豹子河間公齊救之道盛敗死二十四年冬十二月楊文德據葭蘆城招誘氏羌武都等五郡氏皆應之

二十五年春正月魏仇池鎮將皮豹子帥諸軍擊之

文德兵敗棄城犇漢中豹子收其妻子僚屬軍資及
楊保宗所尙魏公主而還初保宗將叛公主勸之或
曰奈何叛父母之國公主曰事成爲一國之母豈比
小縣公主哉魏主賜之死楊文德坐失守免官削爵
土

張溥曰沈約言楊氏兵精地險境接華漢伺隙
邊關首鼠疆徼遂西入白馬東出黃金乘晉燾
之捷構圍涪之豐齊之宣皇定命先驅致屈南
城全勝萬里裴劉二將藉其威聲使濁水靡旗
蘭臯失險功烈盛矣斯蓋謂楊難當助司馬飛

龍爲亂連年南寇規有蜀土而深美蕭思話蕭承之與裴方明劉真道之能奠平也氏楊傜忽見於漢晉苻堅克楊纂徙戶關中空百頃地楊佛奴楊佛狗皆宋奴子也宋奴以殺楊初被誅二子奔堅堅以女妻佛奴子定苻氏之亂定感恩盡力堅死奔隴右後殺於乞伏乾歸無子佛狗子盛統事遂有漢中地定不負君盛不辱兄亦荒服之賢帥也盛素稱藩於晉宋武帝受禪封爲武都王盛承奉晉義熙年號臨沒語其子立曰吾年已老當終爲晉臣汝善事宋帝立承

命始用元嘉正朔善於待士流舊懷德保境令終誠稱善守立死欲以其國授弟難當難當固辭奉立保宗惑於妻言廢之自立流人生變遽失蕃禮虔劉巴蜀喪地奔魏跡其侈心將思吞黑水傾井絡而并仇池之不保狡戎猾夏安在其有利也思話平涼州時難當奉表謝罪亦云臣歷代守蕃世荷殊寵要名期義不在今日豈可假託妖妄毀敗成功乃甘言上騰而控弦復發何以明忠信於朝廷乎姚氏勸難當自立固謂國嶮立長反事孺子非久計今亡仇池者長

君也煽妻鳴雌寧足信哉楊保宗歸魏尙公主
其弟文德說之叛公主亦爲決計欲爲國母而
恥縣主也志大於熾磐王后死賢於沮渠昭儀
是亦難當妻之流而懷望不遂者乎

通鑑紀事本末卷一百八



